

四庫全書

經部

欽定四庫全書

詩故卷七

明 朱謀瑋 撰

小雅

節南山家父刺幽王也何所刺之刺不平也曰尹氏大  
師託詞之婉也何以不平尊寵姻亞斥遠君子為政  
偏頗不均平也曰不平曰國均曰式夷曰不脩曰國  
成詩中凡七言之書曰無偏無頗遵王之義無黨無  
偏王道平平今也不均不平王道其謂何哉節彼南

山維石巖巖言南山雖極崇高然有石為階級可履而登其上也師尹不均不平民畏其威卒無敢言之徒具瞻而已故我託詩以諷刺之也有實其猗實字蓋訛當作有石其猗言山石猗猗接引登履之人也方茂爾惡相爾矛矣謂幽王亦有加惡怒于小人之時若已將加矛戟其身矣然而包承之巧足以自解是以小人終不可去也小人不去君子不得而進矣正月大夫刺幽王也非大夫之刺也蓋申后太子之詞

也曰念我獨兮哀我小心曰是以有侮曰民之無辜  
并其臣僕曰赫赫宗周褒姒威之是非並后匹嫡榮  
枯異等哀痛慘怛者能為是言乎申侯犬戎謀攻幽  
王有成約矣幽王亦既聞之矣故曰民之訛言亦孔  
之將此詩褒姒威之以上八章章各八句語意已盡  
終其永懷以下五章疑是錯簡于此以章皆六句不  
倫故也正月周之正月建子之月也繁霜猶易所謂  
履霜憂在堅冰者也因其有侮故怨毒生焉此召禍

之本也。瞻彼中林，侯薪侯蒸。謂林中雖有材木，都無生意，唯待斬伐而已。喻周民死亡之迫也。山本崇高，今謂正如岡陵之卑，可跨而越也。以喻王室大亂，可虜而亡也。如此訛言，可不知所懲乎。局天踏地，畏禍也。胡為虺蜴，搆亂者也。天天是桷，蔡邕傳引作天天，與周南天天同義，謂少好之赤子，以貧困不養，遂桷喪之也。

十月之交，大夫刺幽王也。何刺之，刺其任皇父以卿士。

也輔相非人故災異迭見而一小人在位羣邪附之  
及其阽危將迫則又請城私邑徙民以實之唐志周  
正十月辛卯日食在幽王之六年鄭箋以為厲王者  
誤也歷法日食前後兩望月必當食彼月而微謂九  
月之望也此日而微則辛卯之朔也向在東都桓王  
與鄭人蘇忿生之田向盟州陘是也去西都千里而  
遙皇父恃寵請城規避戎禍土木繁興徙世家巨姓  
以實之人情懷土重遷傷其獨見搜括故賦此詩

雨无正大夫刺幽王也曰雨无正字之誤也詩三百咸  
即詩語而名篇或取諸首關雎鵲巢之類是也或取  
諸終騶虞權輿之類是也或即篇中而取之庭燎巧  
言之類也或即其人與其事而命之巷伯賡般之類  
也或篇名偶同而分別之小明大明小旻召旻之類  
是也因是而求則大雅必有大宛大弁之篇今則亡  
矣曰常武者奮武之譌也曰雨无正者正大夫之譌  
也此即篇中之語命篇耳劉元城乃欲益以雨无其

極傷我稼穡何其誕哉是蓋摯御之臣所作故曰曾  
我摯御憊憊日瘁夫正大夫以暨三事大夫邦君諸  
侯皆相率去位而違亂矣我欲勉強使還王都則拒  
我曰予已未有室家在此矣泣血鼠竄無非疾苦之  
言也則詰之曰昔爾由王都而出居誰為爾作室乎  
昔既能作于彼今亦可作于此何得以無室而拒我  
哉

小旻大夫刺幽王也曰小旻者小雅旻天之篇也何以



刺乎刺謀國者顛倒是非臻至覆亡也幽王在位僅  
十一年詩以刺之者不一而足由夫婦父子之間大  
倫已斃設心處慮又何足觀此所謂謀亦黜申后登  
褒姒廢宜臼立伯服事耳國有大事雖集衆廷議亦  
唯回適是從適言是聽公論終莫遂也舍哲謀肅又  
之士而唯小人是從將如流泉之決不復可收相與  
淪陷而已暴虎馮河固危道也謀之不善敗國亡家  
其禍尤烈故我用憂懼如臨淵履冰焉

小宛大夫刺宣王也非刺宣也次在小旻小弁之間知  
亦幽王時詩也味其詞則兄弟相戒毋荒于酒教子  
義方求以免禍也鳴鳩古曰博穀今曰郭公季春始  
鳴旦暮刺天而飛未嘗栖止月令鳴鳩拂其羽者是  
也鷹化為鳩蓋即此物舉鳴鳩者明惡鳥化而為善  
喻人性無不可化之理也故曰念昔先人明發不寐  
勉於進修無忝爾祖可矣飲酒溫克進修之一事也  
各敬爾儀舉全德而言也菽英善拆采菽者必乘晨

露未晞之時則無遺脫喻教育者之宜早也螺贏產  
卵于空穴之中必取桑蟲以嫗之喻教子者宜擇所  
師也脊令警悟兩相覺察唯恐或蹈畢弋喻兄弟砥  
礪以德求免禍也桑扈戴勝即今鸛鵒其性嗜肉又  
名竊脂率場啄粟違其性矣人不養之以學則天性  
謬戾勢必陷于刑辟卜以求免不亦晚乎握粟出卜  
細民事也管子稱庶神不格守龜不兆握粟而筮者  
屢中是已末章集木臨谷之戒正成德之事

小弁刺幽王也孰刺之太子之傅刺之也鸛斯鷦鷯似  
鳥小而多羣腹下白性不反哺好食禾麥即今所謂  
寒鴉也首上有毛卓起如弁故曰弁彼鸛斯詩言鸛  
斯多羣猶得叢食田野朝夕還提提自適以喻小  
人冗食于國者甚不少也我何獨見斥逐而失所乎  
蹢躅周道人所共由今則盡為茂草喻王廢棄彝倫  
之道不行也桑梓大葉多陰行者多趨其下以自庇  
若鞠躬然喻幽王獨不庇其子也鳴蜩依柳萑葦依

淵異類相恃以為命我獨流離失所是以憂至不寐也鹿見逐則疾走然必數數反顧以俟其類雉羣集則分壟然必唯唯朝鳴以求其雌物各念族類也今玉獨如病木無復枝幹可持矣何以自立哉兔之投人人或脫之死於道路人或墮之皆惻隱不忍之心所感也王心柰何獨忍至此乎

巧言刺幽王也何所刺疾讒也小弁志在感悟其親故微及信讒而已此則太子已廢追疾讒人而詰責之

所謂讒人蓋褒姒也呼昊天而及父母知處父子之間也君子屢盟蓋與褒姒定盟約立其子也廢置大事安危攸繫如作寢廟者經營非一日定大猷者聚議非一人我之見廢我忖知其故矣由布置之術密造膝之謀深也荏染桑木太子自喻也往來行言喻讒也河濱土踈善陷彼何人而居河麋喻善陷人者也無拳無勇知非丈夫也既微且臆賤而惡之之詞也居徒幾何明其處衽席間無多人也皆斥褒姒也

幽王廢嫡立庶嬖妾黜后以致父子相誅宗社覆滅  
自古禍亂莫甚于此仲尼錄詩不一而足厥有由哉  
何人斯蘇公刺暴公也按左傳武王克商使諸侯撫封  
蘇忿生以溫為司寇桓王八年王以蘇忿生之田與  
鄭人是蘇公被讒失國當在平桓之際矣

巷伯刺幽王也巷即永巷宮中道也巷伯者寺人之長  
篇內所稱寺人孟子者也寺人親近宮掖目擊褒姒  
之讒申后太子之廢故推本其集小過以成大釁如

萋斐小文而成貝錦也天文箕主口舌以喻讒者驕  
人指褒姒勞人指申后暨太子呼蒼天使視之不平  
甚矣投諸豺虎有北而不受下所共惡也投畀有昊  
則謂大地無所復容矣楊園卑濕唯宜楊柳畝丘高  
畝可藝黍稷地有高下故所藝有貴賤然楊園所植  
之物猗猗而長喻寺人雖賤言偶有中也內讒如是  
在朝君子可不圖所以拯救之乎

谷風刺幽王也非刺幽也朋友相弃而相怨也春氣上



升風自谷出謂之谷風草木乘此發生然其作也必  
繼之以陰雨甚則奮迅振掉傷殘草木者有之矣顧  
彼發生之德大傷殘之怨小也汝有患難恐懼則依  
據于我今者既安且寧遽以小怨而遂弃我如遺乎  
蓼莪刺幽王也非刺幽也孝子見放逐者所作也莪一  
名蘿即今詩蘿菜之小而香者孝子自喻其幼時嘗  
見憐愛如莪也今者憎而見逐不啻若蒿之惡矣不  
敢怨望猶曰父母生我劬勞孝子不忍斥言也餅聲

罍耻喻子以不才放逐亦貽父母之辱也出則銜恤  
入則靡至放逐在外無所依託也山高則多悲風人  
情危苦則多悲歎故以南山飄風悲厲喻已違養之  
苦凡民莫不善於事親我獨何故不善致不得終其  
養哉罍酒具也餅汲具也餅汲于井以濯罍餅羸則  
罍無以潔故蒙耻耳

大東刺亂也東國困於役而傷於財譚大夫作此以告  
病也簋殮食之薄者棘七物之微者言往昔朝周資

斧之具不過如此君子循而行之小人目而擊之今  
唯貨賄是責勞役是供疲于奔命大異疇昔矣所以  
睠顧周道而出涕也王子晉曰古之君子其行至慎  
委積施闢道路無限百姓悅之相將遠來視道如尺  
周道如砥之謂也獲薪樵蘇也蘇草刈而束之浸則  
腐敗喻小國單薄不堪過誅也仰視天漢呼天告困  
也跂彼織女之七襄求天代之輸布帛也所謂終日  
七襄者敏于織也古布帛匹長四十尺漢詩五日織

一匹夫人故言遲七襄者成七尺也織女既不能代  
我之織牽牛不能代我轉輸南箕不能代我簸粟北  
斗不能代我挹酒我困終不可支矣

四月大夫刺幽王也大東者東國困于征輸也四月者  
南國困于征輸也周正唯魯用之它國不能盡然故  
稱四月維夏六月徂暑耳觀江漢滔滔知其為南國  
也盡瘁以事知其困征輸也當夏則苦煩暑當秋則  
感凋零入冬則又苦風寒至于薇蕨之生是芳春矣

人皆熙熙于豔陽我顧作歌以告哀是終歲四序無  
復須臾之歡矣利梅粟者蹂踐嘉草以喻利征輸者  
困苦良民也泉水數汲則竭而濁久之泉至而復清  
我力既屈豈有可伸之期乎

北山大夫刺幽王也何刺乎刺為政者役使之不均也  
曰士子者上士中士下士之屬也北山極北之山苦  
寒之地胡虜域也杞謂枸杞今甘肅之杞最多疑即  
其所也曰四牡彭彭旅方剛知防秋于北也杞實

成于秋暮者也

無將大車大夫悔將小人也非此之謂也周室大亂垂  
欲滅亡君子憂之無可柰何之詞也所謂百憂即免  
爰之百罹百憂百凶也將負載之車者塵必及人思  
百憂者憂必傷人由禍亂已成勢不可救徒增鬱結  
而已

小明大夫悔仕於亂世也非悔仕也蓋賢大夫被讒見  
放之詞也光野則所放之地也淮南子言禽獸有光

又稱虎豹有茂草野彘有芄芄則知芄野非復人境  
矣穆天子所謂比徂西土爰居其野虎豹為羣烏鵲  
與處是已載離寒暑經兩歲也念彼共人在朝共事  
之臣也畏此罪罟王未予環也嗟爾君子讒已者也  
靖共爾位誨以義也正直則神福之百祥矣欲其改  
前愆也不怨怒而顧教誨之忠厚至矣

鼓鍾刺幽王也非刺幽也蓋記徐夷偃王僭亂之事也  
大雅曰率彼淮浦省此徐土鋪敦淮濱仍執醜虜宣

王之世淮夷徐子嘗拒王命矣韓非稱徐偃王處漢東地方五百里行仁義割地而朝者三十六國荆文王滅之淮南鴻烈則稱陸地朝徐偃王者三十二國楚莊王滅之所記互異要知當在幽王之世矣曰鼓鍾曰伐磬謂築宮室城隍之舉也曰琴瑟曰笙磬曰雅南謂其僭用周樂也君子聞此而悲幽王之不知懼也王維凝碧池頭奏管弦之感同是感矣



詩故卷七

欽定四庫全書

經部

詩故卷八至十

詳校官監察御史臣沈孫鍾

通政使司副使臣莫瞻菴覆勘

覆校官庶吉士臣毛鳳儀

校對官中書臣朱烜

謄錄監生臣汪緣

欽定四庫全書

詩故卷八

明 朱謀瑋 撰

小雅

楚茨刺幽王也非刺幽也實幽雅也后稷教民稼穡至  
于古公亶父世修其業以身率民此蓋序其治公田  
以供祭享之事也祭必先粢盛與酒醴非藝黍稷則  
粢盛酒醴何所從出哉楚楚整勅貌茨謂編茅茨以  
覆田舍非蒺藜也抽棘以為田舍之藩非除蒺藜與

棘也自昔為此田舍正以藝黍稷故耳記稱大夫濟濟士蹌蹌此云濟濟蹌蹌知豳公之祭先公也近火而熟者謂之燔遠火而熟者謂之炙所燔者肉也所炙者肝也神保者先祖神靈之所保蓋攝尸者之嘉號我孔熯矣熯之訓敬毛傳為優也說文訓熯為乾亦君子終日乾乾之意耳如幾者如所幾望也如式者如所擬度也是皆百福之資孝孫者也降福既已齊備又且稷速而不遲既已匡其所不逮又且勅其

所未戒極億萬年而無替廢也

信南山刺幽王也非刺幽也亦豳雅也楚茨因祭祀而推原粢盛所自出此詩則因力田而成祭享之禮也信彼南山維禹甸之謂后稷教民稼穡夏禹表南山而封之有邵子孫世修其業因其原隰高下而疆理之盡地利矣又能上協天時雨雪霑足故得黍稷彧彧然盛也少牢饋食之禮宿尸之明日主人朝服視殺司馬封羊司士擊豕宗人告備乃退雍人陳鼎于羊

豕之西升胖以及腸既實鼎司宮筵于奧祝設几于筵上主人出迎鼎今曰取其血膋則視殺以至迎鼎時事也

甫田刺幽王也非刺幽也先公勸農之詩也甫田大田也孫無撓言北方謂麥田曰小田種黍稷者曰大田方里而井四井為邑四邑為丘四丘為甸四甸為縣一井之地為田九百畝一邑為田三千六百畝一丘為田一萬四千四百畝一甸為田五萬七千六百畝

一縣為田二十三萬一千畝歲取十千舉一縣而言  
十萬而取萬是徹法也介者間也勸農之暇相其秀  
民而進之語使就學也北方地高少水常苦于旱故

祈甘雨

大田刺幽王也非刺幽也農夫答甫田之詞也螟即螟  
蛉之螟食葉青蟲也螾說文作螾蓋螟類之尤大者  
蝨賊謂蝗也螾螾自内生蝨賊自外至渰與黠同謂  
陰氣之蔽日者興雨呂覽漢志並作興雲祁祁舒徐

貌韓奕所謂祁祁如雲是已雨我公田則雲者為雨  
矣雲可言興雨則降矣云興雨者誤也

瞻彼洛矣刺幽王也非刺幽也蓋成康之世巡于東都  
之詩也為其時莫可必故次于幽雅之後以著王業  
由先公務農而後成也天子出巡必因狩獵講武故  
曰韎韐有奭以作六師巡狩東都諸侯畢會方國道  
里遠近均平故曰洛水泱泱謂得中央之勢也此朝  
會諸侯之所作故曰福祿如茨君子萬年詞兼頌禱



有如此如茨謂福祿比密如屋之覆茨無所漏也韎者赤色韐者韋韠戎事之服鄢陵之戰楚子所謂韎韐之跗注者是也

裳裳者華刺幽王也非刺幽也天子答瞻彼洛矣之詞也裳裳者華謂華之繁盛好下垂者疑即今所謂棣棠迎春柳之類以其好下故曰裳裳其葉光澤故曰滑兮此華正視則黃覆視則白故曰或黃或白喻諸侯恭敬有光儀也白馬黑鬣曰駱夏后氏所尚之馬

謂杞子也杞宋者夏商之後舉杞以該諸侯耳左之  
左之無不宜之謂諸侯率職來朝唯王命之是聽也  
桑扈刺幽王也非刺幽也諸侯時見于天子天子燕之  
之詞也桑扈戴勝季春來降于桑交交羣鳴應候而  
至喻諸侯時見不違禮也鶯與瑩通謂其毛羽光澤  
非文章之說也不戢不難謂其恭儉有節不難于不  
戢歛也引兕觥而醕旨酒常思桑克以將之未嘗有  
驕敖之色此萬福所以不求而自至

駕鶩刺幽王也非刺幽也諸侯荅桑扈之詞也駕鶩之  
鳥交翼並栖羅者往往一舉而兩得之以喻王之福  
祿輻輳不偏至也古者四馬駕一車謂之一乘故曰  
乘馬云乘馬在廐喻王福祿之備具也

頰弁諸公刺幽王也非刺幽也王者燕親戚諸侯而諸  
侯歌其事也周禮玄冠以燕羣臣皮弁以燕兄弟頰  
許氏說文作規即古規字規為圓者弁之貌也薦與  
猶言猗與那與狀女蘿之輕眇也女蘿輕眇而託松

栢喻已得託親戚于王也雨雪維霰班白之喻也因  
覩頰弁覺華髮之在首知老死之漸至典禮有常期  
燕私有紀極雖兄弟甥舅之密親不能數數與言笑  
也今日之飲王故欲極其歡耳

車牽大夫刺幽王也非刺幽也天子荅頰弁也車恃輪  
以運輸恃軸以立軸恃牽以進止牽者車軸兩頭上所  
關鐵也車牽間關有聲語其遠來之勞憊季女婉  
變語其威儀之謹嚴及既相接莫非德音匪但慰我

饑渴而已即是勞苦謹嚴已當燕勞之况復德音之  
好友乎鷓鴣屬之最健者尾長六尺武人用以挿冠  
示勇健也鷓鴣集平林喻其有武備也令德來教語其  
有文事也山脊曰岡大陸曰阜柞木堅忍宜阜者也  
今陟高岡而柞薪喻希有之觀也高山仰止喻其  
德可師法也景行行止語其順大道也爾若四牡六  
轡數肯來此以慰我心又何老死之足憂乎

青蠅大夫刺幽王也非刺幽也諷王勿近小人也蠅類

有二一青一蒼蒼蠅能乳卵于俎豆中青蠅唯善污  
點潔白之物營營青蠅鳴飛求入之貌語此點白為  
黑之蠅當驅而遠之使止樊籬榛棘間可也若使近  
人則必污穢飲食變白為黑矣其讒譖之言寧足聽  
乎

賓之初筵衛武公刺時也非刺時也燕大賓客歌此以  
諷荒于酒者使之進德也酒之為物亂性靈助凶德  
益疾病長嗜欲者也故禹惡旨酒湯戒甘酒文誥彝

酒先王制禮一獻之間賓主百拜終日飲酒而不得  
醉焉所以備酒禍也鄉射揖讓而升下而飲以酒示  
罰也此言發彼有的以祈爾爵明不以飲為榮也三  
爵不識矧敢多又約飲之至也籥舞一章內有烝衍  
烈祖子孫其湛之語與射侯祈爵似非倫類疑是由  
儀等詩逸篇因句法偶同竄入于此

魚藻刺幽王也非刺幽也朱仲晦所謂天子燕諸侯而  
諸侯美天子之詩也萍藻者魚之所芘網罟之所不

加處也故水靜止則萍藻生焉魚養于此乘流唼波  
數見其首數掉其尾至逸樂也喻已奉戴王政各得  
其所侍燕樂于鎬京焉

采菽刺幽王也非刺幽也天子答魚藻也古者燕享之  
禮必賦詩道意叔孫穆叔所謂三夏天子所以享元  
侯也文王兩君相見之樂也鹿鳴君所以嘉寡君也四  
牡君所以勞使臣也是詩之用于燕也秦穆公燕晉  
公子重耳賦采菽公子賦黍苗是采菽之為天子命



諸侯以命服之樂也采菽者懼或遺失必盛之以筐  
筥諸侯來朝懼或簡禮必錫之以車馬章服檻泉泉  
之阻于石檻臧沸有聲若臧栗然者喻車聲嘒嘒而  
來響不輟也柞木枝幹繁盛其性堅韌足以相載非  
若他木柔脆枝末大則披其本矣喻諸侯秉德守禮  
鎮撫王室而能來朝不驕蹇也紼纚皆維舟之索大  
曰紼小者曰纚舟有大有小故繫維之具亦有紼有  
纚喻諸侯五等有崇有卑而賚予之典有厚有薄也

角弓父兄刺幽王也非刺幽也蓋厲王時詩也天子於同姓諸侯稱伯父叔父稱兄弟於異姓則稱舅父稱昏姻此蓋諷王聯屬諸侯之詞角弓堅勁弭恒外向引而內其弭則足以威疆禦喻兄弟昏姻之國易以踈遠聯而親之則足以威不庭也綽綽有裕言能相容忍也交相為瘡言能相蝨賊也相怨一方兄弟乖戾出亡在外也求其禍端非有大故祇以卮酒未讓而生瞋恨耳甚言怨不在大也老馬識道引駒而行

數數反顧恐其失路也王為諸侯宗主可不顧其後乎如恣口腹而飲食則有醉飽之失矣由其不顧後患故也猱即嚙也亦名沐猴人或羈紲之以為弄具猱善升木不待教而能如以塗附於塗理勢必墜喻人情難合而易離貴乎聯屬者之有道則小人斯附屬之矣雨雪見日則消喻薄道之難自久也莫肯下遺謂王不肯下撫親戚也式居婁驕謂屢用驕矜自居也戎狄貪而無親今王用其道故我用憂

菀柳刺幽王也按楚世家夷王之時王室始微諸侯相  
伐熊渠與其三子皆僭稱王及厲王暴虐熊渠畏其  
伐楚遂去其號強楚畏厲如此則它諸侯可知矣是  
蓋厲王時詩也菀柳喻王室本以芘覆為德今則暴  
虐甚可憂悼不敢往朝懼其誅求無極也蹈鄭箋作  
悼於義乃通鳥雖高飛傳天而止王心貪狠不知所  
極若或往朝但有凶危可矜之禍而已相戒之甚也  
蓋有角弓之諷而後有菀柳之詩矣

都人士周人刺衣服無常也非刺衣服無常也蓋厲王  
暴虐而流死于彘周室無王禮樂崩壞文物墜失君  
子傷焉因思昔日都邑之盛也黃衣狐裘諸侯之服  
行歸于周自其國來朝于王也諸侯來王萬民是則  
無不宗周矣臺笠緇撮羅氏之冠也素錦綢杠旂幘  
之竿也羅氏天子掌鳥獸者也諸侯之貢咸屬焉草  
笠而至尊野服也綢直如髮旂徽之密以喻車服之  
盛也舉臺笠以言諸侯之來貢舉綢杠以言諸侯之

女之來嬪充耳琇實公卿之服也謂之尹姑公卿之女也尹即吉甫之先姑即蹶父之先以衣涉水曰厲垂帶而厲謂庶士也施膏澤則卷髮如蠶謂庶女也末章申言士女之容儀以括前四章不盡之意

采綠刺怨曠也非刺也名伯勞南行之士也前二章代其妻述未歸時事後二章則述已歸時事予髮曲局語不膏沐也六日不詹語不盥浴也古者五日則燂湯請浴故曰五日為期心有所懷故六日不詹耳詹

與姑通即燁字也韞弓綸繩以職其勞親愛之意也  
黍苗刺幽王也非刺幽也南行之士荅采綠也召伯營  
謝事具大雅崧高之篇原隰既平泉流既清即所謂  
徹申伯土疆以峙其糗也因其篇章短小故附之小  
雅

隰桑刺幽王也非刺幽也蓋惜賢者之遯世也桑以飼  
蠶宜植宅畔今云隰桑則處下隰之地去人遠矣以  
其不復見采故深歎惜之我若得見是人樂可知已

末章設為自詰之詞言心既誠愛此賢何不以告其君使徵聘之典行徒中心藏此誠愛何日忘之乎

白華周人刺幽后也所謂幽后則褒姒也此蓋申后見廢之後所作管茅雖無絲麻之美亦有纏束之用王獨弃我魯二物之不若矣又言管茅雖賤均受雨露之澤天步無微不及若甚艱矣王澤何獨偏乎水性皆趨東南今以稻田需澤激池水使之北流喻惠澤之曲施于物也王心獨不然矣桑木堅韌宜車今用



為薪枉其材矣喻已見廢非理也鼓鐘聞外明已之  
枉天下共聞也驚惡而貪以喻褒姒鶴潔而廉以自  
喻也駕央雌雄一德死不相背王顧二三其德矣乘  
石巍然數級高與車等王者履之以升車此云扁石  
卑薄之石也豈足履乎喻褒姒之卑賤不足寵也

縣蠻微臣刺亂也周之盛時每有遣使往還必宴勞之  
四牡皇華出車扶杜所以作也及其衰也士之從役  
者則憚道遠而飲食是憂大夫之所燕者瓠葉與鬼

首而已禮意衰薄世道可知矣

瓠葉大夫刺幽王也說見縣蠻夫藜藿之食已至薄矣  
今乃至烹瓠葉則尤薄惡不中食也禮有兔羹兔醢  
不聞兔首今乃至用兔首饗賓荒簡甚矣典禮廢墜  
故也

漸漸之石下國刺幽王也武人東征小序以為征荆舒  
也漸漸之石蓋積石孟門之險東征所由出也豺豕  
四蹄皆白性好負塗故其白常隱今以行潦滌其污

泥故見白躋知征夫之苦雨矣而月又離于畢將復  
雨焉憂沾濡之不暇何心制敵哉在上者能恤人勞  
苦而慰拊之則在下者忘其勞苦此詩自述勞苦則  
在上者不能恤拊其下可知矣

苔之華大夫閔時也何閔乎閔西周之將亡也苔華蔓  
生直上一名陵霄其華紫赤將落則色變而黃今曰  
芸其黃矣將落之候喻周室亂極勢必亡也羊墳其  
首山無草也三星在留水無魚也人食鮮飽饑饉甚

也天下將亂必先饑饉而後戎馬是生焉

何草不黃下國刺幽王也幽王之世鮮所征伐此蓋王  
悅褒姒數舉烽火以召諸侯之師至則無寇而罷故  
諸侯之見役者怨苦之而賦此詩

詩故卷八

欽定四庫全書

詩故卷九

明 朱謀瑋 撰

大雅

文王篇者文王受命作周也非受命作周也周公相成  
王宗祀文王于明堂以配上帝因述文德以訓于王  
也禮祖有功而宗有德周之先公盛德莫如文王故  
宗祀之曰疊疊曰穆穆曰緝熙敬止皆其德之著見  
者唯其有是盛德故大命集于有周而其孫子光有

天下濟濟多士為之楨榦商之孫子咸來臣服而助祭于廟庭焉蓋殷未喪天下時亦嘗以其祖之有德者配天矣今既改命則配天者文王矣天命可不畏哉可不虞度其予奪之際哉然而上天之事無聲臭可求矧儀刑乎唯當儀刑文王之德則萬邦咸信而奉戴之天命常在我矣陳錫哉周侯文王孫子言上帝敷錫大命以顯融文王之德故孫子世受其福也裸將謂將灌鬯之事北音重濁故讀灌為裸

大明文王有明德故天復命武王也非此之謂也是詩  
蓋述武王伐商之事推本受天命則由王季文王之  
德也王季太任維德之行故能生此文王文王厥德  
不回又娶太姒是以篤生武王乃有伐商之事也調  
適得宜之謂變武王應天順人而伐紂故曰變伐大  
商矢誓也謂誓師也維予侯興三語即誓辭也涼韓  
詩作亮訓相也謂師尚父實相佐武王成克商之功  
也古者兩君相見則歌大明蓋欲其知周德之有自

使畏天命而述職耳

繇文王之興本由大王也非此之謂也蓋周公相成王  
追王太王祀以天子之禮而述其造周之事以明當  
王之意也所謂太王者古公亶父是也太王自豳為  
狄所逼避而之岐疆理土田營建宮室城邑以完制  
度以備即其勢力足以克復舊物雪前日之愠然猶  
與狄通其聘問待時乃舉故四郊之柞械既拔征伐  
之道路亦開昆夷憚其報復不俟驅逐一皆遠遜維



喙息之不暇也此詩八章太王之事已具末又舉文  
王虞芮之訟似不相屬疑他篇之錯簡

棧樸文王能官人也此蓋周公追述其事故稱辟王稱  
周王壽考首言棧樸小材祇供薪槱語奔走使令之  
臣也繼稱髦士奉璋則賢雋進矣繼言六師及之則  
得人益衆矣水氣至薄積而為雲漢猶能為章于天  
周王壽考德教入人深矣寧能不興起此多士乎金  
玉必追琢之乃後見寶人材必教育之乃後成德此

文王勉勉設教唯以綱紀四方而已

旱麓受祖也是蓋王用享于岐山之詩也何以言之曰  
清酒曰騂牡曰干祿曰神所勞矣皆享事也曰旱麓  
知大雩也因雩而享故曰求福不回曰鳶飛曰魚躍  
言精誠之格于上下也錄是詩者著勤民也

思齊文王所以聖也此周公述文王之德而推本其所  
生之母能孝能慈教之有自故在宗則能順事于先  
公處家則能儀刑于妻子在宮則雖離以和在廟則

肅肅以敬不顯亦臨不媿屋漏也無射亦保檢身若  
不及也無射非無厭也謂無間隙之失如律中之无  
射也有是德矣故戎疾不殄烈假不瑕蓋其性與天  
合不必聞之傳師而自中法式不必資之諫諍而自  
入道義所謂戎疾大可疾惡者蓋謂紂也所謂烈假  
猶易稱王假有家之假功烈所假謂三分天下有其  
二也言文王智力足以殄絕紂命則以畏天之故不  
即殄之身受諸侯之朝顧又率諸侯以事紂而人不

敢瑕議之其敦德躬行有如此故成人小子莫不是則是倣一皆行古之道而得美俊之譽也

皇矣美周也非美周也述文王伐密伐崇之事而推本  
太伯王季克讓以至于文也周自后稷封邰歷夏商  
二代千有餘年而得文王中間自邰竄豳自豳遷岐  
皆在西北故曰乃眷西顧此維與宅謂岐周也帝已  
作邦于岐向非太伯能讓則文王何能光有大業故  
太伯之讓實能篤厚周家之慶也上帝耆之耆訓為

老謂求老成之國而式用以廓清其亂乃授周以西  
土也串夷載路周頌所謂彼徂矣岐有夷之行也畔  
援猶言判渙怠而後時之義也歆羨則汲汲而先事  
矣謂不後不先適當可伐之機也聲色孟子所謂聲  
音笑貌是也言執玄德而化馳若神不以聲色為大  
也夏謂染采以飾外草謂莞皮以矯揉不以夏草為  
長謂其誠實無偽也

靈臺民始附也非民始附也文王為靈臺以望氛祲察

災祥因為辟雍而作樂章以肄習其間也毛傳但言鼉為魚屬陸疏乃云鼉皮可以冒鼓愚按八音之革原用牛革而鼉皮之鼓似非先王正樂當闕其疑

下武繼文也武王克商放牛休馬載橐弓矢故周公述其事而作是詩下武謂以武功為下明周家世尚文德也三后之神以文德在天故武王偃武修文于鎬京以配對之永言配命謂恒以配對天命為言而成王者中孚之德也能成其孚則下國是徼矣孚下國

者莫大于孝思天下諸侯所以愛戴于王一人應以  
順德者由武王能嗣祖考未卒之業而定天下也凡  
此孝思不唯昭此嗣服亦將昭之方來使繩祖武于  
萬年矣受天之祐四方來賀藩屏以佐周室至于萬  
年豈不同其久遠哉

文王有聲繼伐也言功伐之能相繼也文始治岐義聞  
宣昭四國來朝則以道路險遠艱于往來故自岐遷  
豐以求安定示大業之垂成及武王克商撫有天下

益廣其都會之所自豐遷鎬以詒子孫于安皆大君  
之淵謀也蓋岐在今陝西之鳳翔豐在今陝西之西  
安豐鎬相去二十五里而岐山則在豐鎬之西三百  
餘里矣

生民尊祖也何以尊祖周公相成王郊祀后稷以配天  
而推本其受命之祥與樹藝稼穡之功也姜嫄者帝  
嚳之世妃從帝祈子郊禱其精誠敏于感神故曰履  
帝武敏歆俗儒誤釋遂謂見大人迹而履其拇妄誕



甚矣羅願稱羊生六月為犖七月為牽先生如牽蓋  
不俟十月之彌而先生故曰載震載夙語先期也大  
戴記稱陸終之妻女隤孕三年而始粥啓其左脅六  
人出焉昆吾參胡彭祖鄆人曹姓芊姓是已古先賢  
聖之產多異常人而后稷特無它異故曰不圻不副  
所以顯赫其靈者實上帝安寧之將欲使樹稼穡而  
康禋祀之典也腓字鳥覆極言其為神靈所護不必  
實有其事也較與袂通取羝以袂謂以犧羊祀方社

田祖祓除螟螣蟲賊之害故曰以興嗣歲皆農事也  
若謂較為道祭大不然矣后稷勤勞稼穡民享其賜  
有如此故宜配祀于天乃無罪悔郭景純言秬秠皆  
黑黍一稊二米者而秬或一稊三四米故得巨名宗  
廟用秬釀酒尚嘉異之物也糜與鹽通今赤粱也芑  
則白粱粟也北方多黃粱而赤白粱以少見貴故曰  
天降嘉種

行葦忠厚也此燕諸父兄弟之詩也秬寬引古語曰檀

拓而有鄉萑葦而有叢言物類之相從也蘆葦旁無  
枝幹所恃叢叢相依而後能立喻兄弟親族理宜敦  
睦而後王室有所夾輔也春雨既濡正祭祀之時因  
覲行葦方苞以興感既祭而燕所以敦親既燕而射  
又以考德射不勝者酌以大斗祈其耄勤稱道不亂  
以引翼我曾孫竝受福也

既醉太平也非也此諸父兄弟荅行葦也國語叔向說  
此詩曰類也者不忝前哲之謂也壺也者廣裕人民

之謂也室家之壺猶言室家漆漆耳非謂宮巷之深  
遠也堯典九族既睦平章百姓百姓昭明協和萬邦  
此云昭明有融是皆平章之效也女士猶言士女倒  
文叶韻耳非謂女之有士行者從以孫子猶言以從  
爾之子孫蓋國以民為本土女受釐而蕃庶是國家  
景命之著見者也

鳧鷖守成也非守成也燕公尸也祭先公必卜子孫為  
之尸祭之明日又燕攝尸者此其樂歌也鳧鷖水鳥

性警善飛苟有猜疑不安則飛擾遠去此云鳬鷺在  
涇在沙在渚知其安閒自適喻公尸之安其燕也

假樂嘉成王也非嘉成王也公尸荅鳬鷺之樂歌也左  
傳中庸引詩皆作嘉樂嘉假聲相近而誤耳嘉樂君  
子猶言樂只君子也武王稱諸侯為友邦冢君酒誥  
亦稱太史友內史友伐木詩稱友生故曰燕及朋友  
公劉召康公戒成王也詩無戒意蓋召公述公劉造幽  
之事以告成王使知王業所由始耳始后稷封于有

邵蓋歷數世而後夏衰用失其官而不窳竄居戎翟之間至公劉而始能國乃相民居定京邑立宗廟制三軍行徹法足材用終周之世以徹田為取民之則也公劉居豳而涉渭采取金石之材就汭水以止其旅明闢境廣遠為遷岐之階級也

洄酌名康公戒成王也非戒也乃誨也誨其化民當以漸也西北泉多苦鹹居民每挹行潦注之罌罌而澄清之以治飲食蓋行潦雖濁久澄則清喻民德雖闇

教深則化故必豈以強教之弟以悅安之豈弟君子  
民之父母教民之道莫尚于此矣

卷阿召康戒成王也非戒也亦誨也周公復子明辟成  
王始親政事召公故陳沔酌卷阿二詩以誨迪于王  
地之高平曰陸大陸曰阜大阜曰陵大陸曰阿云卷  
阿者大陵而卷曲足蔽衝風而集燠氣者也飄風自  
南則仲夏也草木於是乎蕃廡景物於是乎鮮華王  
以是時來游欣暢可知矣誠能茂對天時覆育萬物

使之各遂其生是謂能盡其性而能盡人之性可以  
贊天地之化育矣故曰豈弟君子俾爾彌爾性似先  
公首矣百神爾主矣純嘏爾常矣一語而三致其丁  
寧焉是乃啓迪之要也彌者滿也充滿其性純乎一  
仁無有不足也馮翼孝德顯叩圭璋皆喻從游卷阿  
之多士復以鳳凰比成王百鳥比多士翩翩其羽雖  
雖喈喈皆謂百鳥蓋鳳凰所止百鳥從之鳥非一物  
故但舉其飛鳴之衆而已梧桐二木相類以子別之



桐子小而圓梧子大而橢今蒼梧之桐其實長大而特甘知為梧矣

民勞召穆公刺厲王也墨子荀子竝稱厲王染于號公長父榮夷公終夫榮公之用芮良夫謂其好專利而不知大難知周室之必敗矣所謂詭隨則其人也所謂民勞謂困于繇役征輸之事也民困則貧貧則思亂故敢為姦宄不逞以延旦夕之命於是有強陵弱衆暴寡寇虐之禍所由起矣勢使之然也王今用汝

為政存亡禍福之機甚弘且大我故進此大諫耳

板凡伯刺厲王也爾雅訓板為僻謂王性僻繆政令乖戾下民盡被疾苦也苟能悔禍自咎改易所出之詔而輯和其民謗議斯熄矣殿屎說文本作唵呻吟內痛之聲也如壘如簏喻天人之相應如璋如圭喻天人之合德如取如攜喻天人之相授受也人心所歸即天命之所在人心去則天命移矣儆戒之詞也藩垣屏翰誨以求輔自助也敬天之怒誨以納諫改

過保大命也出王猶言出往謂一動靜一語默天皆明察其得失而降禍福焉柰何不敬畏乎

蕩召穆公傷周室大壞也厲王虐國人謗王王怒得衛巫使監謗者以告則殺之國人莫敢言道路以目召穆公故託為文王傷殷紂之亂以致詞蕩蕩者廣大含弘之貌非法度廢壞之說也彊禦掎克皆滔德者也魚休猶言咆哮熊虎震怒殺物之聲也如蜩如蟬喻在位者之謗議如沸如羹喻在下者之怨讟小大

舉內外上下遠近而言也

抑衛武公刺厲王亦以自警也其辭自警也其志則刺厲王也抑抑威儀即假樂所謂威儀抑抑以言厚自降挹謙虛以納規諫之益是乃進德之一隅也推而極之斯成全德矣靡哲不愚據自賢者而言也一挾自賢之心必且拂諫飾非無往而不愚矣惟聖罔念作狂此所謂哲人之愚也一曰敬慎威儀又曰敬爾威儀無不柔嘉又曰輯柔爾顏不遐有愆又曰淑慎

爾止不愆于儀又曰告之話言順德之行又曰聽用  
我謀庶無大悔皆語其謙和受諫而去矜傲也彼童  
而角謂頑童之總角者伊訓所謂比頑童遠耆德是  
矣頑童之比耆德必遠此大足潰亂汝小子之國政  
猶投桃報李之必然也荏染猶言忍冉謂木性强忍  
而可屈者宜被絃以為弓人能溫恭下人者則必虛  
懷以成德

桑柔芮伯刺厲王也芮伯者畿內諸侯為王卿士者所

謂蒞良夫也桑葉多陰行者每息其下喻宗周為四方小國所恃賴也今一朝傾覆猶桑未隕黃頓見將采無復陰庇可望矣故次章曰靡國不泯又曰云徂何往明亂自京師禍及天下也填者積久之名愴怛填兮謂憂亂而中心不寧非一日矣四牡騤騤喻人心遑遽思避亂也國步蔑資言國運窮蹙無復四方援助之可資也為謀為毖謂謀國者毖密自私不諮訪于衆也誨爾序爵明當時在高位者皆非其人也

以匪人而當國政勢必引用阿私讒賊之徒猶執熟湯在前鮮不思濯其手也邇衝風而行者必呶僂而不前處亂世而仕者必失意而思退此稼穡所以維寶明仕之危不如農之安也鹿有長林豐草尚呼其類乃今朋友顧不相好而維譖害是用乎爾雅西風謂之泰風敗物之風也以此貪人唯聚歛是事雖大谷為之一空無論君子小人皆被其害然良人猶能用善道以自勉不順之人必發揚其陰賊而思畔矣

今不用其良乃謂良人為悖何哉民之罔極言民心貪亂而難測者正由面是背非之人為民不利所致耳民既已回適矣而又專力激成之遂使為盜為寇猶然詈我刺其涼薄即欲言我非有所刺然我實已為爾作此桑桑之歌矣

雲漢仍叔美宣王也宣王承厲之烈內有撥亂之志遇災而懼側身修行欲銷去之天下喜於王化復行故美之也占候之術欲知當雨當視天漢有無雲氣若



雲氣塞河漢者當雨候也暴有黑氣相逐于天漢中  
不出三日當雨矣此言雲漢昭回于天謂周歲之內  
河漢昭明未嘗有雲氣也久旱可知已昭回于天猶  
月令所謂星回于天也蘊隆蟲蟲韓詩本作鬱隆炯  
炯謂鬱熱之氣炯炯然盛也寧俾我遯自疑非德而  
居尊位上違天心思遯去也庶正謂六官之長友紀  
則六官之副貳僚屬也友紀之官散在奠瘞禋祀之  
所唯正卿兼該庶務所以鞠且疚也始言雲漢昭回

于天終言有嘒其星是終其禱猶弗雨矣大命近止  
饑旱之極國將亡也無棄爾成圖再禱也

崧高尹吉甫美宣王也何美乎美宣王之能封建諸侯  
也大封建大征伐大巡狩皆成周之盛典宣王能舉  
封建之典以封申伯是可美也唐虞之世姜姓實為  
四岳之官岳神享之降福于其子孫世為侯伯故曰  
維嶽降神生甫及申蓋申甫齊許皆姜姓也按郡國  
志南陽郡宛縣本申伯所封之國棘陽縣東北百里

有謝城是即既入于謝之地也

烝民尹吉甫美宣王也仲山父為宣王卿士食采於樊  
時有城齊之役王命仲山甫董其事尹吉甫作此以  
送之民有耳目則能公視聽有心智則能別臧否故  
曰有物有則而民性之常莫不唯懿德是好若仲山  
甫之為卿士可謂有懿德者矣以後五章皆叙其懿  
德之實也柔嘉維則謂其高明柔克以為法也愛莫  
助之言其德靡不舉無俟于助也城齊之事毛傳謂

齊以邑居逼隘去薄姑而遷臨菑亦以土功大役皆  
稟王命明諸侯之宗周也

韓奕尹吉甫美宣王也何美乎美其能錫命也韓之先  
為武王之子封國在涿郡方城縣宣王之時錫命為  
侯伯總領北方諸侯及百蠻故曰王錫韓侯其追其  
貊奄受北國因以其伯也貊羆皆猛獸白者貊黃者  
羆

江漢尹吉甫美宣王也宣王命名穆公平淮夷而還錫

命上公賜以圭瓚秬鬯故尹吉甫述其事而作是詩  
孔叢稱九命作伯乃有圭瓚秬鬯之賜考者成也古  
者論譔其先祖之有德善功烈勲勞慶賞聲名列於  
天下而酌之祭器自成其名以祀其先祖是之謂考  
故曰作召公考

常武召穆公美宣王也經文有奮武而無常武疑字誤  
耳南仲太祖毛鄭異義若謂命南仲于太祖之廟則  
文近躁蹙若謂南仲為皇父之太祖則文又迂複總

之出車南仲與此南仲未詳時世同異邇日歛人吳  
元滿謂太祖是宜社造禰之祭謂使南仲尸之也文  
義似通

瞻卬凡伯刺幽王也婦有長舌為厲之階謂褒姒譖申  
后廢太子事也有譖廢而後戎難興鞠人忒貳譖始  
竟背則長舌之實也商賈趨時若猛獸驚鳥之發唯  
利是競故所營常獲三倍褒姒以婦人而秉商賈之  
心則何惡而不可為哉戴沸檻泉喻在下衆口之沸

騰

召旻凡伯刺幽王也篇末舉召公故名召旻所以異於  
小旻也瞻卬言亂自內作召旻言救亂非人坐見喪  
邦也蠹賊內訌謂褒姒潰潰回遘謂皇父家伯仲允  
聚子之徒也昏桷謂昏惑于王桷喪國本也潰茂猶  
言蕢茂呂覽所謂樹鬱則為蠹草鬱則為蕢此言歲  
早則百草萎黃何能蕢茂喻民之遭亂憔悴無生意  
也米經春鑿麤者為糲精者為粳粳以喻賢人糲以

喻回適

詩故卷九



欽定四庫全書

詩故卷十

明 朱謀瑋 撰

周頌

清廟祀文王也成王營洛而作清廟以祀文武此其始  
奏之樂也洛誥稱王在新邑烝祭歲文王騂牛一武  
王騂牛一而君牙之書曰丕顯哉文王謨丕承哉武  
王烈此言不顯不承其義一也知文武並崇不獨祀  
文矣

維天之命太平告文王也非也清廟之樂凡四章此則獻文之樂故曰於乎不顯文王之德之純維清則獻武之樂故曰文王之典尚纘述也烈文則祭禮既成而燕及助祭諸侯之樂也所謂維天之命於穆不已言天德也唯其命之不已故生生相繼文王之德之純言文德也唯其德純故誠一不貳假以溢我左傳引作何以恤我設為問詞也駿惠我文王曾孫篤之則答詞也言能大順文德日篤不已則亦足以上合

天德矣

維清奏象舞也非也清廟之祭獻武王也武王伐紂反  
商之政天下清明由其能率文王之典而得天心故  
自肇禋以至成禮肅雍顯相一切奉戴于王實維周  
室之禎祥也

烈文成王即政諸侯助祭也此序非也清廟禮成燕及  
助祭者而奏是詩也始言諸侯能來助祭濟濟趨事  
上洽天心以故錫此祉福而子孫保其無疆之惠是

宜燕樂以勞之繼言王室所以崇貴諸侯之來助祭者為其能備四海九州之美味以致孝思非欲有所大費于汝之邦也汝當念此助祭錫福之功紹繼其美不廢斯禮可耳末又申言文武之德可訓可式而不可忘自宜來祭于周也

天作祀先王先公也此追王太王而祀之之樂故著其開岐之功言自古昔以來天作岐山唯太王始能荒之荒之云者謂奄有之也太王既已作矣非有文王

康安其民則亦無以成今日之王業故往者險阻之  
山今遂化為平易之道先王生養之澤深矣子孫可  
無求所以保之之道乎

昊天有成命郊祀天地也叔向以為道成王之德是矣  
蓋祀成王之樂也宥則民懷其德密則民懷其刑懷  
德則仁昭矣懷刑則義立矣於此而殫其心新造之  
周所以安靜是守成之所當法者也

我將祀文王於明堂也稱天知祀上帝也郊特牲而此

稱牛羊知祀帝于明堂也古禮尚右天在右則文王  
在左知配享也文有典則以貽子孫我既師法文王  
昭事上帝以日靖乎四方天必錫文以嘏福而右饗  
之矣我又敢不畏天之威以保天命乎

時邁巡狩告祭柴望也春岱岳夏南岳秋西岳冬北岳  
四時各以其方故曰時邁序天下之貴莫尊于有周  
故巡守之典自我行焉薄言震之謂發使告諸侯使  
來會行在所也莫不震疊謂諸侯聞來巡守懼以罪

見罰黜內自震恐也百神河嶽省方之所有事也式  
序在位則班瑞于羣后也戢干戈橐弓矢則武王時  
事也周官所謂九夏此則肆夏蓋取肆于時夏之語  
耳

執競祀武王也非祀武也祀成王康王而推本於武王  
也毛傳泥序而稱不顯乎其成大功而安之則誤矣  
思文后稷配天也后稷播時百穀此獨舉來牟者月令  
麥為首種汜勝之農書亦稱田有六道麥為首種舉

首種者以該其餘也大麥為牟小麥為來牟即麥聲之轉耳生民敷陳其詳此則約畧其要雅頌之體則然也

臣工諸侯助祭遣于廟也非此之謂也王者春省耕也臣工農官若周禮司稼之屬稱在公其所職也維莫之春戒毋後時也稱新畬著田野之日闢也庠具也錢鏹今世所謂鉋鋤用以治新畬者也穫禾短鎌謂之銍奄觀銍艾以成功勗之明不徒勞也



噫嘻春夏祈穀于上帝也非祈穀也實戒農官之詩也  
孔氏疏稱王者之立田官每三十里分為一部令一  
主田之吏主之其吏皆大夫為之十千為耦則萬夫  
也鄭箋謂萬夫之田方三十二里云三十里舉成數  
而言成王之世禮樂大備康王嗣位唯以務農富民  
為事矣

振鷺二王之後來助祭也杞宋者夏商之後猶之三恪  
有客禮焉杞宋來朝則諸侯莫不具集振振而盛比

之白鷺羣飛行列整肅威儀可尚也在彼無惡宜民  
宜人也在此無數崇德象賢也庶幾夙夜以永終譽  
獎進之詞也苟能夙夜敦是道也得無永終其譽乎  
豐年秋冬報也禮有祈焉有報焉噫嘻祈也此則其報  
也月令孟春元日祈穀于上帝而不見報祀之舉豈  
即孟冬大割祠于公社及門閭臘先祖五祀勞農以  
休息之者乎其所謂報乎

有瞽始作樂而合乎祖也禮春誦夏弦太師詔之瞽宗

瞽精於聽者也故常命之典樂而肄樂之所謂之瞽  
宗曰有瞽有瞽在周之庭知周公作樂始肄之也作  
是樂也將以娛先祖之神而助祭之客來止有以示  
禮樂之大成焉

潛季冬薦魚春獻鮪也月令季冬命漁師始漁天子親  
往乃嘗魚先薦寢廟季春薦鮪于寢廟此云潛有多  
魚知季冬薦魚之樂也西北牛羊多而魚鼈少故雅  
頌往往舉魚類之繁以著物之備耳

雖禘太祖也非禘也武王克商歸祀于周廟邦甸侯衛  
駿奔走執豆籩之事此其樂章也皇考烈考皆謂文  
王也周公相成王乃尊謚文王而諱昌此云烈考又  
曰克昌厥後知為武王時詩也毛傳以烈考為武王  
誤矣

載見諸侯始見乎武王廟也蓋非也有瞽始肄樂也雖  
則有事文廟諸侯助祭也此則祭禮告成諸侯咸來  
受命武王率之再見文考而頒爵于廟庭也介眉壽

以下頌禱之辭也

有客微子來見祖廟也非見祖廟也實微子之來朝周也萋且者包匭之盛多敦琢者玉帛之繁縟所謂旅者庭實旅百之物也淫大也威畏也知天命之靡常大懷畏懼故來朝周遂得助祭于廟而先王降以平格之福也

武奏大武也周公相成王制禮作樂象武王伐紂之事作大武之樂孔子所謂武盡美矣未盡善者此也國

語稱金奏肆夏樊遏渠天子以饗元侯肆夏則時邁也樊與繁通則雖也遏則此詩也所謂邁劉是矣

閔予小子嗣王朝於廟也成王免喪周公作此以啓誨于王勉之使法祖也非朝于廟也武王勝殷遏劉既已奄有天下今王嗣位撫綏為艱第須保有皇考之業永世克孝使無隕墜可耳然功莫大于武王德莫高于文王苟能上法皇祖夙夜敬止以繼序前王庶足以守成矣

訪落嗣王謀于廟也非謀於廟也成王述咨政所得而思所以率昭考也率時昭考則羣臣所以進語于王者未堪家多難蓋謂遺大投艱于已也紹庭上下陟降厥家則徘徊籌度所以圖治也

敬之羣臣進戒嗣王也周公既作文王在上之詩以述文德所宜配天此則成王刺取其詩之要以自警也命不易哉天難忱也將謂奉持之以行也日就月將謂日有所近月有所行也唯能就而近之乃能將而

行之此學之所以緝熙也

小毖嗣王求助也非求助也蓋成王悔聽流言而迎復  
周公賦此以答鴟鵂也莽蜂必得辛螫喻小人流言  
之當遠也桃蟲翻飛維鳥喻賢不肖名實之當辨也  
蓋物有蟲鳥區已別矣今聞桃蟲之名昧於物理者  
莫不疑以為蟲必覩其拏飛乃後知為鳥也人言可  
無詳審而輕信之乎說詩者未達此旨乃曰鷦鷯生  
鵬言始小而終大恠僻甚矣未堪家多難謂以幼沖



而當遺大投艱之任也予又集于蓼謂聽流言而捐  
棄聖輔自苦于治也

載芟春籍田而祈社稷也此及良耜皆豳頌也實函斯  
活百穀既播含生意也有厭其傑苗氣充足傑然挺  
也縣縣其薦耘去稂莠宜及其早也周書綿綿不絕  
將尋斧柯是其義矣胡考猶言胡耆老人瘦露高結  
如垂胡也古文祖字通作且匪且有且謂非獨祖先  
之世為然也振古蓋謂后稷之時

良耜秋報社稷也其笠伊糾結其繫笠之纓也其鐻斯趙銳其刺耨之鋤也荼蓼一物紫色為荼青色為蓼百室百夫之室也十夫有溝百夫有洫千夫有澮萬夫有川此稱百室舉一洫之田為言也

絲衣繹賓尸也按禮大夫冕而祭于公弁而祭于已士弁而祭于公冠而祭于已爵弁之服玄衣纁裳皆絲為之故曰絲衣非公祭不得頌故知絲衣載弁者士也正祭省牲眡滌濯皆大夫典之此省牲眡滌皆爵

弁之士故知其為繹繹之為言尋也昨日祭已今日復祭也昨以為祖考今則為賓尸

酌告成大武也武王克商述其武功為大武之樂此下四詩皆其樂章也酌即內則之勺蓋即鑠字之誤耳  
遵養時晦觀兵孟津而還也是用大介牧野之會友邦冢君咸來助也我寵受之受其來助之師也天命既集人心亦順故建此蹻蹻之武功今王嗣之而天下無異志者實由武王弔民伐罪而起無自私之心

大見信于天下也

桓講武類禡也非類禡也蓋述武王既克商而有天下也左氏稱周饑克殷而年豐此綏萬邦屢豐年是其事已予以四方克定厥家謂代越戲方伐靡伐衛伐磨伐宣方伐蜀伐厲之類以是武功上昭于天故天命用集而代商以有天下也

賚大封於廟也語稱周有大賚善人是富此蓋散鹿臺之財發鉅橋之粟以大賚于商民也言我所以受天

命而克商者皆由文王勤勞撫綏三分有二我但纘  
繹其緒而求所以大定耳是周之所以為周由乎仁  
及物也我敢不繹思其故而散此畜聚之財以賚善  
人乎

般巡守而祀四嶽河海也此非巡守而祀也蓋克商之  
後列爵為五分土為三班瑞羣后改物革命也墮山  
喬岳允猶翕河謂遣使以革命之故告山川也敷天  
之下哀時之對時周之命戒其順時恭命于周也

魯頌

駉頌僖公也駉為考牧之詩魯之大政也似非僖公所  
能辦蓋伯禽時事耳堯土宜牧今世猶然夫魯政多  
矣獨舉考牧一事軍國之所重也思無疆言經畧之  
思無所不至也思無期言無限極之期也思無斁言  
無厭斁之心也思無邪本讀作徐言無怠緩之志也  
孔子引此以蔽三百用為邪正之邪斷章取義耳  
有駉頌僖公君臣之有道也非頌君臣也蓋諸侯相見

燕會之詩也駢彼乘黃會同所駕之車也在公明明  
執禮以相見也振振鷺鼓咽咽樂舞之備也自今以  
始歲其有語能繼也君子有穀詒孫子以善相規也  
豈亦伯禽時詩乎

泮水頌魯僖公能修泮宮也此詩盛言克服淮夷獻馘  
泮宮之事按左傳僖十六年冬公從齊侯會於淮而  
被執明年九月乃得釋歸不聞僖有伐淮夷之功也  
伐淮夷而得志者魯公伯禽耳事具費誓通典載魯

郡泗水縣泮水出焉則知泮為水名魯侯作宮其上  
故曰泮宮漢儒妄受師說以為諸侯學宮曰泮宮失  
其實矣大賂廣賂也君及卿大夫皆有所賂是為大  
賂

閔宮頌僖公能復周公之宇也此頌僖者頌之變也變  
則非正也何也魯周公之後禮樂之所自出也禮不  
王不禘而魯侯爵也乃曰皇皇后帝皇祖后稷是郊  
天而以后稷配也作者記之曰周公之孫莊公之子



以著僭天子之禮樂自僖始也俗儒不達經意乃稱成王以周公有大勲勞命魯公世祀周公以天子之禮樂祀帝于郊配以后稷不亦誣哉敦者治也治商之衆尚書所謂三千一心者也周公其首矣故但稱王曰叔父建爾元子省文也三壽上壽中壽下壽也三壽作朋謂并三等之壽而有之也黃髮台背壽胥與試若曰與彼黃髮台背之老試其強健也

商頌

那祀成湯也湯之功德偉矣宜在可述此詩獨舉執鼓  
管磬庸鼓之聲與萬舞之奕以及執事有恪者何哉  
商人尚聲聲之盛是德之盛也湯之功德自有大護  
之樂此所謂聲蓋即大護之聲耳自古在昔執事者  
恪以傳之雖助祭之賓聞此莫不夷懌則成湯來格  
綏我思成其可知矣

烈祖祀中宗也中宗者湯之玄孫大戊也無逸稱中宗  
嚴恭寅畏天命自度治民祇懼不敢荒寧享國七十

有五年殷道用以中興故號中宗申錫無疆中宗申  
錫之也及爾斯所所與王敬作所之所同謂致力以  
求治也既載清酤亦有和羹醢假無言時靡有爭所  
以交於神明之際也殷道尚質質生敬其於祭也一  
唯精誠之潛通不徒文物聲樂而已假至享獻溥廣  
將助也言諸侯八鸞鷁來假以四海九州之美味  
來獻大有助於我受命主祭者故天神祖考享之而  
降福非謂於我受政教之命亦非自言受命之廣大

若曰溥將我受命之人耳倒文法也

玄鳥祀高宗也高宗者中宗玄孫之孫武丁也玄鳥降而生契毛傳以為高辛率簡狄以春分玄鳥至之時祈郊禱而生契是矣呂氏春秋乃為玄鳥墮卵之說史遷述之以入殷紀中候契握從而和之鄭箋援緯以說經妄繆甚矣武丁孫子對先祖而言也武王靡所不勝者若伐荆楚克鬼方之屬也湯有景亳之命高宗亦自河徂亳此云景員維河殷受命咸宜者舉


湯暨高宗會諸侯之地而言也員與云通語助詞

長發大禘也此祭契暨相土以湯配之也昔舜之命契  
曰百姓不親五品不遜汝作司徒敬敷五教在寬故  
此詩曰受小國是達受大國是達率履不越明五教  
之達天下也契之孫曰相土蓋嗣為司徒益明其教  
不徒中夏率履雖海外四夷亦截然而向化厥後子  
孫世其封能恭帝命無所隕墜以至于湯而湯又能  
聖敬在躬昭假上帝而受命也玉之有聲者為球小

球大球綴冕之圭也袞冕十有二旒前後各用玉百四十有四綴合旒玉以成袞冕以比聯合大國小國而成至尊也小共大共謂梁棟之間節稅大小不一皆以成室也爾雅臬之大者曰栱長者曰閣說文龐高屋也此云駿龐謂高大之屋也中葉謂相土以後成湯已前有震且業謂國緒中微震懼將危也

殷武祀高宗也高宗武丁也易稱高宗伐鬼方三年克之用力蓋亦勤矣鬼方即今貴州荆楚之尤阻險者

荆楚既克諸侯咸來受命于商故曰勿予禍適稼穡  
匪解言侯之靖恭厥職也不僭不濫不敢怠遑以言  
高宗刑政之明黜陟有其道也此所以宜號高宗者



詩故卷十